

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- मुख्यमंत्री उमर अब्दुल्ला होरें राजौरी ते पुंछ जिले दे जनप्रतिनिधिएं कन्नै बजट कोला पैहले आला सलाह सूत्र कीता।
- उमर अब्दुल्ला होरें सब्बने अस्पतालें च जरूरी सुविधाएं ते सेवाएं दी दस्तेयाबी पर जोर दित्ता तां जे निक्की मुट्ठी इमरजेंसी लेई मरीजें गी बड्डे असपतालें च मुंतकिल करने दी लोड़ नेई पवै।
- जम्मू कश्मीर विधानसभा दे बजट इजलास लेई कार्यक्रम कलेंडर जारी। मुख्यमंत्री 7 मार्च गी 2025–26 ब'रे लेई बजट पेश करगंन।
- उपराष्ट्रपति जगदीप धनखड़ होर श्री माता वैष्णो देवी यूनिवर्सिटी दे 10में दीक्षांत समारोह च शामिल होने लेई अज्ज जम्मू आवा करदे न।
- मौसम विभाग नै 18 फरवरी तगर मौसम खुश्क बने रौहने दी पेशगोई कीती ऐ।

<><><><><><>

CM Pre Budget

मुख्यमंत्री उमर अब्दुल्ला होरें कल सिविल सचिवालय जम्मू च पुंछ ते राजौरी जिले दे विधायकें कन्नै बजट शा पैहले सलाह सूत्र आली बैठके दी प्रधानता कीती। मुख्यमंत्री होरें आखेआ जे इनें बैठकें दा मकसद लोकें दे नुमायंदे थमां लोकें दी प्राथमिकता ते आसे—मेदें बारे जानकारी हासल करना ऐ। उनें आखेआ जे एह सरकार दी जिम्मेदारी ऐ जे नमीं परियोजनाएं दे कन्नो कन्नी जारी परियोजनाएं गी समें सिर पूरा करना जकीनी बनाया जा। मुख्यमंत्री होरें समावेशी विकास दे महत्व उप्पर ते लोकें दी आसें—मेदें पर खरा उतरने दी लोड़ पर जोर पाया। उनें आखेआ जे विधायकें आस्सेआ उजागर कीती गेदी जरूरतें, मामलें ते प्राथमिकता गी औंदे बजट च शामिल करने लेई बचार बमर्श कीता जाग.....

<><><><><><>

CM Medi Con

मुख्यमंत्री उमर अब्दुल्ला होरें जम्मू च आयोजित ते.के.मेडीकॉन 2025 दरान समूलचे प्रांतै च अस्पतालें च इमरजेंसी सेवाएं गी होर निगगर बनाए जाने दी जरूरतै पर जोर दित्ता ऐ। किट्ठे गी संबोधत करदे होई उमर अब्दुल्ला होरें आखेआ जे सरकारी मैडिकल कालेज श्रीनगर च मरीजें दा बड़ा मता रश रौंहदा ऐ जेहदा इक कारण ग्रामीण इलाकें च मयारी सेहत सेवाएं दी अजें बी कमी ऐ। उनें नमें बनाए गेदे मैडिकल कालेजें च सुविधाएं बाद्धा करने दी जरूरतै पर जोर दित्ता। मुख्यमंत्री होरें सेहत सेवाएं दे बधदे व्यवसाईकरण पर चिंता प्रगट करदे होई आखेआ जे हर सरकारी अस्पताल च अज्जै कल्लै दियां आधुनिक तकनीकां, माहिर डाक्टर ते होर दुइयां सुविधाएं उपलब्ध होनियां लोडचदियां तां जे हर निक्की मुट्ठी जरूरतै लेई मरीजें गी बड्डे अस्पतालें च मुंतकिल करने दी लोड नेई पवै।

<><><><><><>

LA Session

जम्मू कश्मीर विधानसभा सचिवालय आस्सेआ कल अपने दुए इजलास दे कार्यक्रम दा कलेंडर तारी कीता। आकाशवाणी दे जम्मू संवाददाता नै जानकारी दित्ती ऐ जे एह 7एं ब'रे परेंत पैहली बारी ऐ जे जम्मू कश्मीर च लोकें आस्सेआ चुकी गेदी सरकार बजट पेश करोग, जेहड़ा स्पीकर अब्दुल रहीम राथर हुंदे आस्सेआ जारी दस्तावेज मूजब 7 मार्च गी पेश कीता जाग। विधानसभा दा इजलास 3 मार्च गी उपराज्यपाल हुंदे अभिभाषण कन्नै शुरू होग। 4 कोला लेइयै 6 मार्च तोड़ी उंदे अभिभाषण पर धन्नबाद प्रस्ताह पर चर्चा होग। ते 7 मार्च गी 2025–26 ब'रे लेई बजट पेश कीता जाग। एहदे कन्नो कन्नी 2024–25 ब'रे लेई पूरक अखराजातबारे बजट बी सदन च पेश करने दा कार्यक्रम ऐ। ओहदे बाद 8 कोला लेइयै 11 मार्च तोड़ी बजट पर आम बैहस होग ते बैहसू पर परता 11 मार्च गी दित्ता जाग। 12 मार्च कोला लेइयै 25 मार्च तोड़ी असैंबली दी कारवाई दरान ग्रांट मंगा पेश कीतियां जांगन जिसलै जे 11 अप्रैल शुक्रवारें बजट इजलास संपन्न होई जाग।

<><><><><><>

Ne Va

सूचना प्रौद्योगिकी दे कमीशनर सैक्रेटरी सौरभ भगत होरें केन्द्र शासत प्रदेश च राष्ट्रीय ई-विधान एपलीकेशन नेवा गी लागू करने दी समीक्षा लेई उच्चि सतह दी बैठक दी अध्यक्षता कीती। बैठक दरान कमीशनर सैक्रेटरी होरें नेवा गी लागू करने दे बक्ख-बक्ख पैहलुएं दा आंकलन कीता जिंदे च बक्ख-बक्ख मैहकमे दे विधायकें, असैंबली अमला ते नोडल अफसरें लेई सिखलाई कार्यक्रम दा सरिस्ता करना, जम्मू ते श्रीनगर विधानसभा परिसरें च हाई स्पीड कनेक्टिविटी ते जरूरी हार्डवेयर ते एहदे कन्नै सरबंघत चीजें दी खरीद शामिल ऐ।

उनें नेवा दी सफल अमलावरी गी जकीनी बनाने दे कन्नो कन्नी विधाई प्रक्रियाएं गी डिजीटल ते आधुनिक बनाने लेई जम्मू कश्मीर प्रशासन दी प्रतिबद्धता गी पही पक्का कीता।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिक्खा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

VP-Jammu Visit

उपराष्ट्रपति जगदीप धनखड़ होर इक दिनै दे दौरे पर अज्ज जम्मू आवा'रदे न जिस दौरान ओह कटड़ा च श्री माता वैष्णो देवी यूनिवर्सिटी दे 10में दीक्षांत समारोह दे मुख्ख परौहने दे तौर पर अध्यक्षता करंगन। आकाशवाणी दे जम्मू संवाददाता दी जानकारी मूजब उपराष्ट्रपति हुंदा रियासी जिले च त्रिकुटा पहाड़ियें पर स्थित श्री माता वैष्णो देवी दी गुफा ते भैरो मंदर जाइयै मत्था टेकने दा बी कार्यक्रम ऐ। उआं उपराष्ट्रपति जगदीप धनखड़ हुंदा एह दौरा पैहले पिछले बरे 27 दिसंबर गी होना हा, पर साबका प्रधानमंत्री मनमोहन सिंह हुंदा काल होई जाने पर केंद्र सरकार आसेआ घोषित कीते गेदे राजकीय शोक कारण इस दौरे गी अगड़ा पाई दित्ता गेआ हा।

<><><><><><>

Minister Satish

सूचना टेक्नालोजी, विज्ञान ते प्रौद्योगिकी मंत्री सतीश शर्मा होरें कल श्री माता वैष्णो देवी यूनिवर्सिटी कटड़ा च “जैव विज्ञान ते रसैनी तकनीकें च नमें आयाम” बारे लग्गी दी त्रीह अंतर्राष्ट्रीय कांफ्रेंस च शिरकत कीती।

सम्मेलन दरान मंत्री होरें पुलवामा आतंकी हमले दे शहीदें गी श्रद्धांजलि भेंट कीती ते दऊं मिंटे दा मोन बी रक्खेआ गेआ। इस मौके बोलदे होई समीश शर्मा होरें आखेआ जे इस सम्मेलन दा मकसद दुनिया च तकनीक दे क्षेत्र च आवा करदे नित नमें बदलाव कन्नै वाकफ कराना ऐ तां जे उंदे इस्तेमाल कन्नै समाज दी तेजिया कन्नै तरक्की ते खुशहाली जकीनी बनी सकै। उनें आखेआ जे मजूदा समें च जैविक विज्ञान ते रसैन टेक्नालोजी दी कुलसंसारी चुनौतिएं दा मकाबला करने च मती महत्वपूर्ण भूमका ऐ।

<><><><><><>

Mahakumbh

प्रयागराज दे महाकुंभ नै इतिहास रची दित्ता ऐ, की जे एह दुनिया दा पैहला ऐया आयोजन ऐ जेह्दे च 50 करोड़ शा मते लोकें सिद्धे तौर पर हिस्सा लैता ऐ। त्रिवेणी संगम च अजें तोड़ी 50 करोड़ 4 लक्ख शा मते श्रद्धालुएं पवित्र स्नान कीता ऐ। उत्तर प्रदेश सरकार नै आखेआ जे इन्नी बद्ध गिनतरी च लोकें दी शमूलियत मनुक्खी इतिहास च कुसै बी धार्मिक, सांस्कृतिक जां समाजी आयोजन च सब्बने शा बड़्डा किट्ठ ऐ। सरकार नै आखेआ जे अमरीका, रूस, इंडोनेशिया, ब्राजील, पाकिस्तान ते बंगलादेश जनेह् मुखें दी आबादी शा मते लोकें पवित्र स्नान कीता। तोआई दुनिया च पैहली बारी कल 300 शा मते सफाई कर्मिं महाकुंभ च गंगा नदी दे कंडे दी सफाई करियै पैहला रीवर क्लीनिंग रिकार्ड बनाया ऐ। इस दरान एह संदेश दित्ता गेआ जे गंगा ते होरनी नदिएं ते जल स्रोतें गी स्वच्छ रखना किन्ना महत्वपूर्ण ऐ। एह सफाई अभियान महाकुंभ दे बक्ख-बक्ख घाटें पर शुरू कीता गेआ जिंदे च सेक्टर 4 च रामघाट, सेक्टर 7 च भरद्वाज घाट ते सेक्टर 9 च गंगेश्पर घाट शामिल न।

<><><><><><>

Ramban Fisheries

मच्छी उत्पादन ते विकास दर च बाद्धा करने दे मकसद कन्नै रामबन जिले च मच्छी पालन मैह्कमे आस्सेआ नमीं तकनीक दा इस्तेमाल कीता जा'रदा ऐ तां जे बेरोजगार युवाएं गी मच्छी पालन सरबंधी नमीं तकनीकें बारे जानकारी देइयै उनेंगी सशक्त बनाया जाई सकै। इसै सिलसिले च रामबन दे बनिहाल च मच्छी पालन मैह्कमे नै ट्राउट मच्छी दी बिक्री सरबंधी इक केन्द्र स्थापत कीता ऐ। प्रधानमंत्री मतस्य संपदा योजना तैह्त् उत्पादन इकाइएं गी लागू कीता गेआ ऐ जेह्दे च सामान्य वर्ग यानि जनरल कैटागिरी लेई 50 प्रतिशत केन्द्रीय मदाद दित्ती गेई ऐ जिसलै के अनुसूचित जाति वर्ग यानि एससी कैटागिरी लेई 60 प्रतिशत केन्द्रीय मदाद दित्ती गेई ऐ।

उआं केन्द्रीय प्रायोलित स्कीमें तैहत मच्छी पालने आले गी 3 ज्हार रपे दी माली मदाद दित्ती जंदी ऐ। इस बारे मती जानकारी देआ करदे न। मच्छी पालन मैहकमा रामबन दे सहायक निर्देशक अतुलाह खान.....

<><><><><><>

Weather

मौसम विभाग नै जम्मू कश्मीर च औंदी 18 फरवरी तगर मौसम दे खुश्क रौहने दी पेशगोई कीती ऐ। मैहकमे दा आखना ऐ जे अज्ज मौसम खुश्क बने दा रौहग जिसलै के कल संजा'लै मौसम बदलोखडा रौहने दे ते प्रदेश च उप्परली धारें पर हल्की बरखा जां बर्फबारी दी मेद ऐ। 12 फरवरी ते 13 फरवरी गी उप्परली धारें पर बरखा बरी सकदी ऐ। पर आम तौरा पर मौसम च मता बदलाव दिक्खने गी नेई लब्भोग।

<><><><><><>